

ELIYA LE MONEELO WA BUPI

2 Oo, a seo ga se therešo! “Morena, ke a amogela.” Ke amogela eng? Tshepišo ye nngwe le ye nngwe yeo A e dirilego, ke ya ka.

3 Bjale, pele re dula, a re inamišeng dihlogo tša rena feela nakwana gore ke se lebale go rapelela disakatuku tše fa.

4 Morena wa rena, re a Go leboga bošegong bjo bakeng sa dipina tša Tsione, bakeng sa Ebangedi ya fešene ya kgale ye e hlwekišago dipelo tša rena go tšwa go bobe, gomme, ka gore, ditshepišo tša mogau kudu ka Beibeleng ke tša rena. Ka tumelo re a di amogela. Gomme re a tseba gore Modimo ga a hlomphe motho. Gomme ka go moloko woo Paulo a phetšego ka go ona, batho... ba bantsi kudu ba be ba babja. Ba tlišitše go yena disakatuku, dithethwana, gore a di bee godimo ga mmele wa gagwe, gomme morago o tsere go tloga mmeleng wa gagwe go ya go balwetši le batlaišwa. Gomme Mangwalo a re botša gore meoya ya ditšhila e tšwetše ntle ga batho le ditlaišego di ba tlogetše ka baka la tumelo ya bona go Morena Jesu. Modimo, Paulo o ile lebaka la mengwaga ye e ka bago dikete tše pedi, ka go Bogona bja Gago. Moloko wola o fetile le yena, eupša O Modimo wa moloko wo mongwe le wo mongwe. Bjale batho, bošegong bjo, ba dumetše go Wena gomme re neela go Wena, bošegong bjo, disakatuku tše le diphasela tše nnyane tša dilo, le go dumela ka pelo ya rena yohle gore O tla araba thapelo ya rena gomme ba tla fodišwa. E fe, Morena. Re e romela go bona bakeng sa letago la Modimo, ka Leina la Jesu, Morwa wa Gagwe. Amene.

5 Le ka dula. Gomme bao ba beilego tše ba ka tla go di tšeа feela ka pela ka morago ga go tswalelwga ga tirelo.

6 Ke thabile kudu bošegong bjo. Ke bile ntle go kgabaganya thaba kua lehono ka pela ge ke feditše ka dipolelonyakišišo tšeо ke swanetšego go ba le tšona, gomme ke ile godimo go rapela. Gomme nako le nako ge ke fihla ka go letšatši le la leganata le mokgwa wa go ntira ke nyake go bowa morago gape. Eupša selo se tee seo ke se thabelago bošegong bjo, mosadimogatša wa ka... bontši bjo re bilego mmogo, gomme o bone dipono tše kgolo tša Modimo di bonagatšwa le go tla go phethega. O be a le tlase nokeng letšatšing lela ka Jeffersonville ge Morongwa wa Morena a dirile ponagalo ya Gagwe ya mathomo, e be e pakelane godimo ga Associated Press go kgabaganya setšhaba. E bile... e be e le 1933. O be a eme fale, eupša o kwele Segalontšu eupša ga se a bona Seetša. Moo, ebole le batšeadiswantšho ba kuranta ba bone Seetša. Eupša o be a le yo moswa kudu nako yeo, gomme a le e ka ba mengwaga ye lesomepedi bogolo, gomme ga se nke a bona Seetša. O be a bogetše batho, ba bantsi ba be ba idibala.

Gomme se nno dula fale feela e ka ba motsotsotso o tee gomme morago sa ya thwi go otologa morago godimo ka lefaufaung gape. Gomme dikuranta di beile athekele ye kgolo, "Seetša sa sephiri se tšwelela godimo—godimo ga modiredi wa selegae wa Baptist ge a be a kolobetša." Se ile tsela yohle ka Canada, se bile go kuranta ya Canada.

⁶ Gomme ka gona e ka ba mengwaga ye meraro goba ye mene ya go feta, ge ke be ke le ka Phoenix la mafelelo, Ke a dumela e be e le Ngwanešu Jack Moore a bego a na le nna, gore o bile mohuta wa... Mosadimogatša wa ka o boi kudu. Gomme kafao o mmileditše sefaleng, a se a letela, gomme o nyakile a idibala. Gomme o tlie ka morago ga ge ke šetše ke fihlile mo sefaleng, gomme tlotšo e be e le fale bakeng sa tirelo ya phodišo. Gomme, o rile, lekga la mathomo a kilego a ba ka go Bogona bjola fale ka mokgwa wola. Gomme, bošego pele ga bja go feta, o Mmone sefaleng, lekga la mathomo a kilego a Mmona, ge E be se le mo e eme sefaleng. Gomme ge ke kopana le yena ka ntle o... megokgo e be e le mahlong a gagwe, gomme o rile, "Billy, lekga la mathomo bophelong bja ka, ke E bone." O rile, "Ke... o be o rapelela mosadi, gomme" o rile "Ke E bone e no tla thwi pele ga gagwe le go ema fale feela dinakwana di se kae, ya sepela tikologong moo o bego o le. Gomme ka gona, ka pela ge o emisitše go bolela, E tlogile." Kafao ke thabetše seo, gore E tle pele ga mahlo a gagwe. Le a bona, mohumagadi yola yo monnyane o ne bontši go kgabola, gomme kafao ke thakgetše le go e thabela.

⁷ Bjale, gosasa tirelo ya phodišo ya bošego. Le a tseba, re be re bolela beke ye gore ditirelo tša phodišo di tla tla ka Labohlano bošego. Bjale, etlang gosasa morago ga sekgalela goba—goba ka pela mo mantšiboeng, e ka ba iri ya boselela, gore le se tsenatsene tirelo yohle. Gomme Billy, Leo, Gene le bona, ba tla ba fa ka dikarata tša thapelo, go le fa karata ya thapelo. Ke ge re tliša batho mo sefaleng le go ba rapelela. Bjale re... ke... Ke swanetše go rwala dikopano tša Amerika ka tsela ye batho ba rutilwego, go bea diatla godimo. Bjale, leo—leo ke Lengwalo, eupša leo ke motlwae wa Sejuda. Seo ga se sa Bantle, eupša Bantle ba e rwala. Montle o be a le, "Ga ke na maswanedi gore O tle ka tlase ga tlhaka ya ka, e no bolela Lentšu gomme mohlanka wa ka o tla phela." Yeo ke nnete. Eupša Mojuda, "Etsla o bee diatla tša Gago godimo ga morwedi wa ka gomme o tla phela." Le a bona, woo e be e le motlwae wa bona, e be e se bakeng sa Bantle.

⁸ Bošego ka morago ga bošego, le iri ka morago ga iri, go kgabola mosegare le bošego, Moya wo Mokgethwa o a tla, o utolla, go ya go kgabola moago, o bolela diphiri tša dipelo. Le e bona nako yohle. Seo ke go le dira le tsebe gore Bogona bja Morena bo mo. Bjale, ge o ka no Bo amogela, o tla fodišwa thwi nako yeo. Ka gobane phodišo yohle yeo e kilego ya direlwana, e šetše e fedile, e bile lebaka la mengwaga ye makgolo a lesomesenyane. Phološo yohle yeo o ka tsogego wa e amogela,

šetše e lefetšwe, ke ya gago feela go e amogela. E bile mengwaga ye makgolo a lesomesenyane, goba bontši, ge e sa le e eba phološo go wena. Eupša bjale le a ntlhokomela dikopanong, ke re, “A e tla le dira le dumele?” Le a bona, maswao le dimaka ga se tša phodišo goba phološo, eupša ke go dira batho go lemoga le go kwešiša gore Bogona bja Modimo bo fa. Gona O...ge A...Ka fao go tla bago, ke bontši bja mohlolo. Re no ba bjale re thoma go bona mehlolo.

⁹ Bjale ge go etla go motho, go bile le boati bja bona ba emeleta go tloga maakong le ditulo tša bagolofadi le dilo, gomme ba tšwela ntle. Woo ga se mohlolo tlwa. Aowa. Le a bona, ebile le Saense ya Bokriste e na le seo. E ka kgona go ba se—se—se seemo sa monagano seo o ka kgonago go ba... fetola tsela ya gago ya go nagana. Bjale, ga re dumele e be e le yona, gobane ke a dumela e be e le tumelo. Eupša efela...

¹⁰ Ke bile ka La Salle, Lorraine, Fora. Ke bile ka Paris. Gomme ke ile tlase go lefelo moo ba bilego le mosadi wa go hwa a robetše ka fale, o be a bolokilwe. Gomme ba fogohleditše leswika fale, gomme batho ba ile ka fale le digole, dikota, gomme ba di beile fase le go sepela, go tšwa go go fogohletša leswika lela godimo ga mosadi yola wa go hwa. Le a bona, o hwile, gomme ga se a kgona go lopela gape go feta... Go na le mmoelanyi yo motee feela gare ga Modimo le motho, gomme yoo ke Kriste Jesu. Go tšwa lapeng la Katoliki, ke—ke a tseba gore ba dumela ka go—ka go batho bao ba hwago, gore yeo ke meoya ya bona e ba lopelago; ba go fapano, bangwe bakeng sa dipolitiki gomme ba bangwe bakeng sa dilo tše dingwe. Go nna, ke bomoya. Ga ke gobatše maikutlo a lena, ke a holofela, eupša ke swanetše go botega. Le a bona, eng kapa eng e lopelago bahu ke bomoya.

Ba mpotšišitše seo ka Mexico, gomme ba re, “Go reng ka Jesu?”

¹¹ Ke rile, “Yena ga se a hwa. O tsogile gape, O phela go ya go ile.” Le a bona? Yena ga se a hwa, O a phela. Ka moka ga bona ba fetetše mošola, fao, Lengwalo le bolelago gore “Bao ba lego fao ba ka se kgone go tla mo, gomme ba bao ba lego mo ba ka se kgone go ya kua.” Ga go motho a kilego a tshelela goba a ka tsogego a dira. Kafao seo se a e ruma ge... Jesu o boletše bjalo.

¹² Eupša re hwetša dilo tše di šoma. Kafao bjale gomme bošego bjo bongwe le bjo bongwe Moya wo Mokgethwa o leka go le tlišetše Bogona bja Sephedi sa Gagwe fa, e sego bogona bja motho. Motho a ka no ikokobetše yenamong, ka mpho a ka inelago yenamong ka go sekgao se rilego sa Moya woo o ka bulago Modimo go lena. Eupša e ka se tsoge ya šoma go fihla wena wenamong o e dumela le go e amogela, gomme gona e a šoma. Le a bona, ge o ka be o dutše fale gomme yo mongwe le yo mongwe wa lena—yo mongwe le yo mongwe wa lena o tla be o sa dumele, a sa dumele Lentšu la Lona, le ka se tsoge la šoma.

¹³ Jesu, ge A ile go sehlopha sa Gagwe mong, naga ya Gagwe mong, mediro ye mentši ye megolo O be a ka se kgone go e dira ka lebaka la gosedumele ga bona. Gomme ge A se a kgona go e dira nako yela, A ka se kgone go e dira bjale, ka baka la gosedumele. Le a bona, ke tumelo ya gago.

¹⁴ Kafao go tšea wena le nna, mmogo ka Moya wo Mokgethwa, go tliša dilo tše go phethega; go ntira go hlalala, go le dira le hlalale, gore Modimo o fa yoo a bolokago Lentšu la Gagwe.

¹⁵ Eupša ge Moya wo Mokgethwa o ka kgona go tla ka kopanong, wa phethagatša tlwa go Lengwalo se A boletšego gore se tla direga ka matšatšing a mafelelo, le go ya ntle godimo ga batheeletši boka A dirile ge A be a le mo, le go hlatha tšona diphiri tša dipelo, le dikgopolole maikaelelo a pelo le monagano, e ka ba mang a ka belaela bjang? Le a bona, go na le mohlolo wa go phethagala, bontši bja mehlolo go feta segole se sepela, gobane ga go kgonege go seo go direga ntle le maatla a semoya. E swanetše go ba maatla a semoya go dira seo. Kafao, gomme gona le a e bona feela tlwa se Beibele e se tshepišitšego le se ba se dum... se re se dumelago. Ke mohlolo wo montši go feta go goeletša. Le a bona, ke mohlolo kudu go feta go bolela ka maleme. Paulo o boletše bjalo. Ebile le dimpho tša mmapale tša Moya wo Mokgethwa tša go bolela ka maleme, ke mohlolo kudu go feta woo. Re godimo ga mohlolo wa mafelelo. O akanyeditšwepele ka tsela yeo ke Beibele.

¹⁶ Kafao, bošegong bjo, ga wa swanelo go leta go fihla gosasa bošego go tla go kgabola mothalo go bewa diatla godimo. Bjale, go bea diatla godimo ga gago go ka se dire bontši go feta tekolo ya dikgopolole tša pelo; e sego bontši bjalo, go nna. Gona o ka no e amogela, wa swarelela go yona, ke ya gago. Gomme o e dumela ka pelo ya gago yohle.

¹⁷ Eupša gosasa bošego, ge le... Lengwalo le re, "Eyang ka go lefase lohle, rerang ebangedi go sebopiwa se sengwe le se sengwe; maswao a a tla latela bona bao ba dumelago." Maswao ohle; gomme morago, mafelelong, O rile, "Ge ba bea diatla tša bona go balwetši, ba tla welwa ke maruru." Yeo ke therešo. "Bao ba..." Mo... Ao a tla latela badumedi. Go lokile. Bjale, re—re badumedi, kafao, ka tsela yeo, re ne bošego morago ga bošego bja go bea diatla godimo ga balwetši, gomme Modimo o šomile mehlolo ye megolo le bona. Re bile le mehlolo ye megolo ka go rapelela disakatuku godimo. Re bile le mehlolo ye megolo ka go hlatha ga dikgopolole tša pelo. Le a bona, yohle ya yona mmogo, e ſoma go letago la Modimo. Ga se ya motho, ga se ya kereke, ke bakeng sa letago la Modimo. Letago la Modimo!

¹⁸ Bjale, pele re bula Lentšu bjale bakeng sa bošego... Oo, re ka phetla morago matlakala ka mokgwa *wo*, eupša Modimo o swanetše go Le bula; ka gobane Lengwalo ga se la tlhathollo ya sephiri, eupša Moya wo Mokgethwa *woo* o ngwadilego Lengwalo

ke Mohlatholli wa lona. Kafao a re inamišeng dihlogo tša rena bjale ge re rapela. Gomme ke ba bakae ba tla ratago go gopolwa ka thapelong, a le ka no e dira e tsebje ka diatla tša lena di phagamišitšwe, e ka ba eng e lego? O Modimo, lebelela. Bohle re a hloka, a ga re? Ke a hloka, le nna, bagwera. Ke na le diatla tša ka godimo.

¹⁹ Tate wa Legodimong, ka go kokobela le go homola le tlhomphokgolo re tla ka go Bogona bja Gago bjo bogolo bja go hlomphega, go tseba, pele selo se setee sela se direga, O mo ka baka la gore O tshepišitše go ba. O rile, pele ga go tloga ga Gago, “Kae kapa kae mo ba babedi goba ba bararo bao ba kgobokanego ka Leina la Ka, fao Ke tla ba magareng ga bona. Gomme ge ba ka dumelana godimo ga selo se tee se sengwe le se sengwe, bjalo ka go kgwatha selo se tee, ba kgopela, ba tla amogela.” Morena, go tliša tshepišo ya Gago go se, theko ya Madi a Gago, ke kgopela gore monna yo mongwe le yo mongwe, mosadi, goba ngwana, bao ba phagamišitšego diatla tša bona bošegong bjo, O tseba pelo ya bona, a nke ba amoge se ba se kgopelago. E fe, Morena.

²⁰ Re batho ba go hloka. Re sepela ka lefaseng la leswiswi, le lenaba le legolo la Gago, gore, re ka se kgone go lwa le yena le gannyane ge eba e be e se bakeng sa Moya wo Mokgethwa wa Gago. Kagona re a tshepa, go dumela, le go dira ka tumelo, gore O tla ya pele ga rena le go dira tsela go hlaka. Melete ye mentši kudu go bapa tselang, e beetšwe dinao tša rena tša go lapa, eupša re leka go latela dikgato tša Madi tša Gagwe yo a fenyago lehu, hele, le lebitla.

²¹ Re hlahle, bošegong bjo, ka Moya wo Mokgethwa wa Gago, Morena, go Mantšu ao a swanetšego go bolelwa, gona hlahlala Mantšu go pelo ye e A hlokago. Ka gona, Morena, a nke mafelelong a kopano, gomme re thome go magae a rena a go fapano, a nke re kgone go bolela gape, boka bale ba tšwago Emause, “A dipelo tša rena ga se tša swa ka gare ga rena ge A be a bolela le rena go bapa le tsela?” Ka gore re e kgopela Leineng la Jesu, le bakeng sa Gagwe. Amene.

²² Go lena ba le ngwalago Mangwalo, phetlang le nna bjale go puku ya Dikgoši tša Pele. Ke rata go bala karolo go tšwa go temana ya 17...tema ya 17, a ke re, gomme ke ya go thoma ka temana ya 14. Balang ya 14, ditemana tša 15 le ya 16 tša tema ya 17 ya Dikgoši tša Pele:

Ka gore o rialo MORENA Modimo wa Israele, Seroto sa bupi se ka se ke sa fela, le sedibelwana sa makhura se ka se gope, go fihla letšatši... MORENA a romelago pula godimo ga lefase.

Gomme o ile le go dira go ya ka polelo ya Eliya: gomme yena, le yena, le ntlo ya gagwe, ba jele matšatši a mantši.

Gomme seroto sa bupi ga se sa ke sa fela, le sedibelwana sa makhura ga se sa ke sa gopa, go ya ka lentšu la MORENA, le a le boletšego ka Eliya.

²³ Go swanetše go bile go nyakile go hlabo ga letšatši ge a phafošitšwe. O retolotše hlogo ya gagwe ya go lapa mosamelong ge a kwele sello, sello se sennyane go kgabaganya kamora. Gomme o be a sa kgone go robala bošego bjohle, o be a tšewatšewa gohle ka baka la masetlapelo a magolo. Mošemane yo monnyane o be a tsogile gape, a se a robala godimo ga metsotsye masomepedi goba masometharo, gomme ke kgona go kwa segalontšu sa gagwe se sennyane se re, “Mama, a o ka se ye ntle gomme wa lebelela ka bobolokelongdijo gape gomme wa bona ge eba ga go feela lerathana la borotho? Ke swerwe ke tlala kudu! Ke no se kgone go robala.”

²⁴ Gomme ge a lebeletše ka go sefahlego sa gagwe se sennyane le... dithama tša gagwe tše nnyane tša go nwelela, gomme mahlo a gagwe a mannyane a fetoga serowlana, moriri wa gagwe wo motelele o lekeletše tlase go šitweng go ripša, sekhethe sa bošego sa gagwe se sennyane sa lenkgeretla; megokgo ye megolo go tloga mahlong a gagwe e rothela godimo ga sefahlego sa gagwe se sennyane, ge a mo phaphathile lerameng gomme o rile, “Morategi, leka go robala, le go kwešiša.”

²⁵ Go be go bile mengwaga ye meraro fale go se gwa ba pula lefaseng. O ile a khunama fase godimo ga lebato, ke kgona go mmona ge a llela ntle go Modimo, o rile, “O Morena Modimo, Jehofa, Wena o Modimo wa botate ba rena, Yo a fepilego bana ba Gago le go ba hlokombela go kgabola mengwaga. Gomme ke lekile go phela therešo le go otlologa go Wena, gomme bjale ke mo go boneng mošemane wa ka yo monnyane a llela se sengwe sa go ja, gomme ga go selo sa go mo fa. Lebaka la dibeke tše dintši bjale re be re itumelela renabeng godimo go lefelo la sejo se tee matšatši a mangwe le a mangwe a mararo goba a mane, gomme bjale yohle e ile eupša bupi bjo bonnyane bja go tlala lehupa le makhura feela ka lehwana. Gomme ke leka go e swara go fihla seetša sa letšatši, gore re se swanele go hwa ge go le bošego. Ke dirile eng, O Modimo? Nna, mohlankagadi wa gago, ke phetše therešo. Monnamogatša wa ka o hwile ntweng, ntwa ya Morena, gomme ke bile mohlologadi lebaka la mengwaga ye mmalwa bjale, gomme ke lekile go phela gabotse le go boloka Melao ya Gago. Gomme ge e le nako ya ka go ya, ga ke tshwenyege; eupša mošemane wa ka yo monnyane, go no ripaganya pelo ya ka diripana go mo kwa a kgopela se sengwe go ja, go se selo go mo fa.”

²⁶ Ge a feditše go rapela, o phagametše godimo. O ile morago go robala gape dinakwana di se kae. Gomme o bile le matsogo a gagwe godimo, gomme lenkgeretla la kaone leo a bego a le apere le be le nyakile le onetše. O ya lefastereng gomme a lebelela

ntle, gomme e no ba kgauswi le go hlab a ga letšatši. Oo, go be go fiša kudu!

²⁷ Diphefo tša go fiša tša kahlolo di be di foka godimo ga setšhaba se se bego se lebetše Modimo. Yeo e be e le nakong ya pušo ya Ahaba, kgoši ye šorošoro kudu ya Israele. Gomme o be a nyetše modiradibe, Isebele, a bego a le morapelamodingwana. Gomme lenyalo la go tswakwa boka leo ga se nke la atlega, le no se kgone go ba, e ba gore mosadi o tla tla ka tsela ya monna goba monna o tla ya ka tsela ya mosadi. Gomme o be a le mosadi yo monnyane wa go bogega kudu, gomme Ahaba, feela mohuta wa modumedi yo bolelo, o be a ineetše go megopol o ya gagwe gomme a re, “Oo, gabotse, bodumedi ga se selo go nna, ke nna kgoši.” Gomme ke kgale ba phušotše dialetara tša Modimo gomme ba beile dialetara tša Baalim, goba Baali, a ke re. Gomme sello se be se le kgahlanong kudu le bodumedi bja therešo go fihla badiredi ka tlase ga ngangego ye kgolo ba ineetše.

²⁸ Nako ye nngwe ya go feta ke dirile tshwayo ka badiredi, goba se sengwe gape mo letšatšing le, gomme sehlapha se kopane le nna gomme sa re, “Ngwanešu Branham, diphuthego tša rena di no gogela godimo ga rena!” Seo ke se se e hlolago, phuthego e tla sepelela ntle ge modiredi a sa ba kgahle.

²⁹ Gomme kafao badiredi ba ile ba wela ka tlase ga maatla a kgoši gobane sebe se be se dumeletšwe, go be go se ne magomo. Ke seswantšho se sebotse kudu sa lehono ka gore, setšhaba se be se kgotleletše dilo tše, batho ba be ba nyaka go tsebalega. Ba naganne, “Ge feela setšhaba se boletše bjalo, go be go lokile.” Yeo ke tsela ye ba bolelago lehono, “Ge feela setšhaba se re go lokile go rekiša bjala, gona go lokile go nwa. Ge setšhaba se dumelela basadi ba rena go apara seripa mo mokgotheng, gomme molao o ka se ba kitimišetše ka gare, gobaneng, go lokile go e dira.” Seo se ka no ba sohle gabotse go setšhaba, eupša ka dipukung tše kgolo tša Modimo le ne boikarabelo gomme le tla swanel a go araba pele ga Modimo. Eupša ba be ba wele, ba ile ba swanel a go ineela ka tlase ga morwalo.

³⁰ Gomme setšhaba se be se atlega, gomme ba naganne gore katlego e be e le leswao gore Modimo o be a na le bona. Seo ga se ka moka therešo. Modimo o tla go lena . . .

³¹ Go na le seema sa kgale, seema se se hlomphollago Modimo, seo se bolelago gore “Modimo o thuša bao ba ithušago ka bobona.” Seo se a hlompholla go Modimo! Modimo o thuša bale ba ba sa kgonego go ithuša bonabeng. Yena ke Modimo wa bale ba hlokago kgaogelo. Gomme Yena ke Modimo wa kgaogelo. Gomme seema sela se bolelago gore “O thuša bale ba ba ithušago bonabeng,” ge le ka kgona go ithuša lenabeng, ga le hloke thušo ya Gagwe. Eupša O thuša bao ba sa kgonego go ithuša bonabeng.

³² Eupša setšhaba se be se naganne, ge feela ba be ba eja gabotse gomme ba be ba apere gabotse, gore se sengwe le se sengwe se tla loka.

³³ Eupša go bile le o tee yoo a bego a sa le wa fešene ya kgale, yoo a dumetšego gore go be go na le Modimo yo a bego a le wa fešene ya kgale, a dumetše gore go be go le Modimo yo a bolokilego Lentšu la Gagwe, a dumetše gore Modimo wa Abraham, Isaka le Jakobo, o be a le yo mokgethwa gomme o nyakile go ineela ka botlalo go bokgethwa bja Gagwe. Eupša Isebele le sehlopha sa gagwe sa sebjalebjale ba mo hloile. O be a le modiša wa bona, eupša ba be ba sa e dumele. Kafao, o ile a swanela go utama bakeng sa bophelo bja gagwe.

³⁴ Gomme Modimo o be a mo rometše godimo thabeng, gomme o rile... a mo fa molaetša, gomme o rile, "Eya tlase gomme o botše kgoši yela ya kgale ye mpe, 'O RIALO MORENA.' Ga e ye go na, goba ebile le phoka e ka wa, go fihla o e bitša." A e fa ka molomong wa Elisa go bitša bakeng sa pula ge e be e le nako bakeng sa yona; eupša o be a swere dikgonyo tša legodimo, o kgonne go le tswalela goba go le bula. Gomme O rile, "Ke nyaka o ye godimo go tšwa lešokeng... la se... ka lešokeng, a ke re, go tšwa go tlhakahlakano ye. Etšwa magareng ga bona. O rerile go bona gomme ba ka se go theetše, gomme kgafetšakgafetša ba befabefi. Eya godimo ka lešokeng, gomme fao o dule kgauswi le noka, Kerithe, gomme Ke tla... setše ke laetše magokobu go go hlokomela." Oo, ge batho ba sa dire, Modimo o na le magokobu a kgonago go e dira!

³⁵ Johane o rile, "Modimo o kgonna ka matlapa a go tsošetša Abraham bana."

³⁶ Jesu o rile, "Ge ba ka homola, maswika ka pela a tla goeletša ntle."

³⁷ Modimo a ka kgonna go dira se A nyakago go se dira. O rile, "Ke laetše magokobu, gomme a ya go go fepa." Gomme a mo tlišeditše nama le borotho.

³⁸ Yo mongwe o boletše nako ye nngwe, "A e hweditše kae, Ngwanešu Branham?"

³⁹ Ke rile, "Ga ke tsebe. Selo se nnoši ke se tsebago, a e tlišitše. A e hweditše go tšwa lefelong la go swana leo Jesu a dirilego ge A tsere hlapi tše tlhano gomme... goba dipisikiti tše tlhano le dihlapi tše pedi, gomme a fepa dikete tše tlhano. E tšwa go seatla go swana sa go hlola sa Modimo Ramaatlakamoka." A mo tlišeditše hlapi le borotho, magokobu, a dutše fase gomme a bo neela go Elisa, gomme a bo ja, le go theogela fase le go nwa go tšwa mothopong. Modimo o be a khutšiša moprefeta wa Gagwe.

⁴⁰ Oo, ke thabile kudu gore Modimo o na le tsela ya go phonyokga! Gomme ge ba be ba naganne o be a gafa, "Moprefeta yola wa kgale, mmolayalethabo yola wa kgale," ka mehla a leka

go tsea thabo go tswa go diphathi ts'a bona t'se nnyane ts'a lethabo ba bego ba na le tsona, a ba botsa gore e be e le sebe. Gomme Modimo . . . yena a latela thomo ya Modimo, o ile godimo ka dithabeng le go dula fase lefelong la godimo, lefelo la go oma kudu ka nageng. Eupsha Modimo o bolokile nokana e ela. Gomme ba be ba le tlase fale ba sohla leleme la bona bakeng sa meetse.

⁴¹ Le a tseba, Modimo o na le tsela ya go araba thapelo. Mosadi yo monnyane yo o be a phetse go rereša. O be a se a nyalwa gape, o be a dula a nnoši go kopana le monna wa gagwe ka letagong. O be a le mosadi wa go hlomphega. Gomme lebaka la dibeke seroto se be se eya tlase, tlase, gomme yena a rapela kgafetsa, gomme go sa lebega boka go be go se kholofelo go bonagala felo.

⁴² Le a tseba, fao re ka hwetša thuto go tswa go seo. Gore, ge o rapetse le go kgotsofatša dinyakwa tšohle tše Modimo a nyakago o di fihlelala, gomme go le bjalo A homotše, ga A bolele e ka ba eng, gomme efela o kgotsofaditše dinyakwa, bjale, go direga eng gona? Ge o tseba gore o kgotsofaditše dinyakwa ts'a Gagwe gomme o dirile tšohle tše o tsebago go di dira, gona tumelo ga e dikadike, e no dula tlhenkge gomme ya nagana maleba. Tumelo e tsea go kgwaparetsa ga yona go go sa felego go dikologa Leswika la Mehleng, gomme ga e šuthe.

⁴³ Moisa yo mogolo yola a bitšwago "tumelo"! Ka mehla ke be ke re, "Tumelo e na le moriri godimo ga sefega." Ge a bolela, se sengwe le se sengwe gape se a homola. Ge tumelo e re, "Homolang!" gona se sengwe le se sengwe se a ema, gobane ke yena molaodi.

⁴⁴ Gomme o kgotsofaditše senyakwa se sengwe le se sengwe. O be a phetse go hlweka, o be a phetse go kgahliša, o be a phela go hlomphega, gomme o be a kgotsofaditše dinyakwa tšohle ts'a Modimo. Eupsha, go be go lebega o ka re O be a homotše. Modimo o dira seo nako ye nngwe go go leka, go bona ke mohuta ofe wa phetogo o tla bago le yona. O se e lebale!

⁴⁵ Ge o feta godimo ga sefala, o rapeletšwe, le diatla di beilwe go wena, gomme go bonala eke ga se gona se diregago, seo ga se emiše tumelo nthatana e tee, o kgotsofaditše dinyakwa ts'a Modimo. Bjale, ge o di kgotsofaditše! Bjale, ge o swere morago go Modimo, o a tseba pelo ya gago e a go ahlola . . . Gomme re a tseba, "Ge pelo ya rena e sa re ahlole, gona re dirile." Bjale, eupsha ge pelo ya rena e re ahlola, ga go bohlokwa bja go tla go kgabaganya sefala, ga go bohlokwa bja go kgopela Modimo e ka ba eng, gobane ga o ne tumelo go e amogela. Eupsha ge o kgotsofaditše senyakwa se sengwe le se sengwe seo Modimo a se nyakago, gona tumelo e gatela ntle kua, gomme ya re, "Modimo ke Modimo! Ke kgotsofaditše dinyakwa."

⁴⁶ Lengwalo le re, "Bao ba letelago go Morena ba tla mpshafatša maatla a bona, ba tla hlatlogela godimo ka diphego bjalo ka ntšhu, ba tla kitima gomme ba se lape, ba sepela

gomme ba se tenwe.” Bjalo ka ge pina e re, “Nthute, Morena! Oo, nthute, Morena, mokgwa wa go leta.” Dira soulo ya ka e hlatswiwe Mading a Khalibari, kgotsofatsa senyakwa se sengwe le se sengwe, tshuma ka moka maporogo go dikologa, le go re, “Bjale, Morena, ga ke tliše selo ka matsogong a ka, gabonolo ke kgomarela Sefapanong sa Gago. O e tshepišitše, Morena.” Woo ke mohuta wa seemo, lebaka batho ba naganago gore ke nna moithokodi. Eupša ka kamoreng, goba godimo ka lehlakoreng la leganata, leo ke lebaka le o swanetšego go tsena ka go lona pele ga ge o sepelela ka phuluphithing ye mo. Ka gore, Sathane ka mehla o lahlela matemonenyana a mannyane go leka go nyamiša se sengwe. Gomme o swanetše go be o swareletše thwi godimo ga Sefapano, o sa tshepe bokgoni bja gago mong, megopolu ya gago mong, go no itshama godimo ga Letsogo la neng le neng. Go se tteleime bohlale, go se tteleime monagano wa gago mong, o no ba o ipula wenamong le go dumelala Moya wo Mokgethwa go bolela. Seo ke seemo Modimo a nyakago Kereke ya Gagwe ka go sona. Tsenang ka seemong seo.

⁴⁷ Modimo o a go leka. Morwa yo mongwe le yo mongwe yoo a tlago go Modimo o swanetše go lekwa pele, a solwe, go bona ge eba a ka emela tsholo. Ge re sepelela godimo gomme ra re, “Ke a dumela gore Jesu Kriste ke Morwa wa Modimo, gore O hwetše dibe tša ka le go tsoga gape letšatšing la boraro. O gobaditšwe ka baka la dikarogo tša ka, o tlpirigantšwe ka baka la makgopo a ka. Kotlo ya khutšo ya ka e be e le godimo ga Gagwe, gomme ka megogoma ya Gagwe ke fodile.” Ge o bolela seo, ka se se ipoletšwego... dibe tšohle tša gago le makgopo a gago, le mabokgoni a gago le tšohle tše o nago natšo, robala godimo ga aletara. Gona, fale, go se selo ka letsogong la gago, Sathane o ya go thunyetša mosebe wo mongwe le wo mongwe go wena a ka kgonago. Eupša gona ge o retologela ka thoko go tloga fale gomme wa re, “Gabotse, mohlomongwe ga se ke phološwe, mohlomongwe ga se ke hwetše go fola,” morago wa retologela kgole go tloga go Leo, Beibele e rile le “bana ba dihlaba, gomme e sego bana ba Modimo.”

⁴⁸ Modimo o leka morwa yo mongwe le yo mongwe wa Abraham boka A dirile Abraham, gobane re peu ya Abraham. Ka go hwa ka go Kriste, re peu ya Abraham gomme re bajabohwa go ya ka tshepišo. Peu ya Abraham, woo ke moyo wo Abraham a bilego le ona. O bile le tshepišo e filwego. Gomme ge tate wa rena a tshepile Modimo le go tsea tshepišo, gosekgonagale, le go swarelela go yona lebaka la mengwaga ye masomepeditlhano pele e ka tsoge ya bonagatšwa, go tia kudu nako yohle, peu ya gagwe feela boka tate. Ga go kgathale se se diregago, ge re rapeletšwe, e rarologile! Ge re hwetša se sengwe le se sengwe tseleng, re kgotsofaditše dinyakwa tšohle, go tloša se sengwe le se sengwe tseleng, gona kgopelang Modimo, gomme le eme fale go tsebeng le ya go e amogela.

⁴⁹ Modimo o lekile Jobo ka mokgwa woo. Ge Jobo a kgopetše kgaogelo, o neetše sehlabelo go bana ba gagwe, selo se nnoši seo moprofeta yola a bilego le sona e be e le moneelo wa go tshungwa. Eupša seo e bile sohle Modimo a se nyakilego.

⁵⁰ Modimo ga a nyake thuto le ditšiebadimo tše dintši, O nyaka pelo ye e neetšwego go thato ya Gagwe. Ga A go kgopele go apara ka tsela ye e itšego, goba—goba go ya go dilo tše di itšego goba dikholetše tše di itšego, gobaigrata. O kgopela bakeng sa wa go kokobela, boitsholo, moywa go robega, le pelo ya go rata go Mo amogela.

⁵¹ O lekile Jobo, gomme a bona ke mohuta ofe wa phetogo A tla e hwetšago ka go yena. Eupša ge A tšere dinku tša gagwe gomme o tšere pholo ya gagwe, gomme o tšere dikamela tša gagwe, gomme o tšere bana ba gagwe, “Ke tla bona se Jobo a se bolelago bjale.”

⁵² Gomme o rile, “Morena o file gomme Morena o tšere, a go šegofatšwe Leina la Morena.”

⁵³ O hweditše se A se boditšego Sathane gore O be a na le sona ka go Jobo, “Ga go yo motee wa go swana le yena, lefaseng.”

⁵⁴ Ka gona medumo ya thoma go rora, magadima a thoma go gadima. Moya o tlide godimo ga moprofeta, gomme a golelša, “Ke a tseba Molopolodi wa ka o a phela, gomme mo matšatsing a mafelelo O tla ema godimo ga lefase. Le ge diboko tša letlalo di senya mmele wo, go le bjalo ka nameng ya ka ke tla bona Modimo; Yo ke tla mmonago nnamong, mahlo a ka a tla bona, gomme e sego yo mongwe.”

⁵⁵ O lekile bana ba Bahebere go bona ke mohuta ofe wa phetogo ba tla bago le yona. Ba ipoletše magareng ga bahetene gore “Go be go le Modimo yo a phelago, go be go le Jehofa Modimo, le gore O be a le Modimo wa Legodimo le Modimo wa lefase, gomme O swere soulo ye nngwe le ye nngwe ka seatleng sa Gagwe.” Kafao Modimo o ba dumelotše go lekwa. Gomme ba kgotsofaditše dinyakwa tšohle, ba rapetše le go tloša se sengwe le se sengwe tseleng. Gomme ga se ba khunamela seswantšho sa kgoši. Gomme o bešeditše leuba makga a šupago go fišifiši go feta go kile gwa ba. Gomme ga go pelaelo gore Sathane o be a leka go ba botša, “Bjo ke bofelo bja tsela.” Ke rata tsela ye ba boletšego, “Modimo wa rena o kgona go re lokolla go tšwa leubeng la mollo, eupša, le ge go le bjalo, ge A sa dire, re ka se robe Melao ya Modimo. Re tla dula therešo! A nke tumelo ya rena e llele ntle go kgabola mengwaga ye e tlago, gore, re dutše therešo go tshepišo ya Modimo.”

⁵⁶ “Modimo wa ka o kgona go mphodiša go tloga go *se*.” Goba, “Modimo wa ka o kgona go ntšea go tšwa go setulo se sa bagolofadi. Modimo wa ka o kgona go dira *se*. Eupša ke Mo amogetše bjalo ka Mofodiši wa ka. Ke ipoletše dibe tša ka (gosedumele ga ka) le go ipolela gore ke a dumela gore Yena ke

Mofodiši wa ka. A go tle, a go sepele eng e ka bago. Ge ke se kaone lehono, ke tla ba gosasa; ge ke se gosasa, ke tla ba išago. Morena o file gomme Morena o tšere, a go šegofatšwe Leina la Morena!"

⁵⁷ Oo, e be e le fao! Gomme ge ba sepeletše ka leubeng la mollo, ka tlase ga teko, ka tlase ga moleko, ba swareletše therešo go fihla bofelong. Eupša Modimo o be a le gona feela mo nakwaneng ya ka pela, gomme O ba hlakodištše. Ba tsebile gore ba be ba rapeletšwe, dibe tša bona di ipoletšwe. Ba tsebile gore ba kgotsofaditše senyakwa se sengwe le se sengwe, gomme go le bjalo O bonagetše a homotše. O nno homola go go leka, go bona ka kgonthe se o lego, se se lego ka gare ga gago, go bona ge ka kgonthe o e ra go tšwa pelong ya gago se o se bolelago ka dipounama tša gago. A nke seo se ye botebong. Re ka bolela ka dipounama tša rena, eupša a pelo ya rena e a e bolela?

⁵⁸ Bjale, ge mosadi yo monnyane yo a tsebile gore o be a kgotsofaditše dinyakwa tše tšohle, gomme go le bjalo Modimo o be a homotše. Go bonagetše eke ebile ga se A mo kgathalele, ga se A tshwenyege ge eba o phetše goba o hwile. Eupša, nako yohle, Modimo o be a šoma. O be a sa tsebe ka yona, eupša Modimo o boditše Eliya. O ile a gopiša noka, a obeletša seatla sa Gagwe ntle gomme a gopiša noka go se sa ela. Gomme Eliya o rile, "Morena, gobaneng e eme?"

⁵⁹ O rile, "Ke laetše mosadi wa mohlologadi go go fepa." O be a šetše a mo laetše, o be a sa e tsebe.

⁶⁰ A ka no ba a laetše bopaki bja phodišo ya gago; o ka no ba o sa e tsebe, eupša e no swarelela. Ge o na le nnete gore o kgotsofaditše dinyakwa tšohle, ge o tseba gore o dirile se sengwe le se sengwe seo o tsebago go dira, gomme wa ipea wenamong pele ga Modimo, go na le selo se tee feela go dira, ke, go lekelela godimo ga tshepišo ya Gagwe nako yeo. Dula fao! Modimo o tshepištše go araba, O tla e dira. Ga o tsebe se A se laetšego, morongwa ofe, goba ke *eng* go dira. Go ka no ba bosegong bjo, pele tirelo ya phodišo e thoma gosasa bošego. Modimo a ka no ba a bone seemo sa gago lehono, A ka no be a kwele thapelo ya gago.

⁶¹ Ke ikwetše go swaba bakeng sa batho ba ba sefoa le semuma. Ke nyaka go bea diatla godimo ga bona le go ba rapelela, go thoma go ema bošego bja go feta, eupša ke rile seo se ka se be gabotse go bohole ba bona. Eupša ke tseba bjang gore felotsoko ga se Modimo wa go homola yo a tsebago pelo, batho ba ba kgotsofaditše senyakwa sa bona sa Modimo, gomme ba komana, gomme go na le morongwa fa bosegong bjo go ba lokolla go tšwa ditlaišegong tša bona tšohle? Ke tseba bjang? Modimo a ka no ba a laetše tokologo ya bona bosegong bjo. Ge eba ke rapelela balwetši, goba aowa, ba tla e hwetša gobane Modimo o e nyakile. Eba le nnete ya Modimo, gomme ka gona swarelela go ya pele, go fihlelela dinyakwa tša Gagwe. Modimo o tseba mokgwa wa

go dira dilo tše di lokilego, o tseba mokgwa wa go e dira ka tsela ya maleba.

⁶² Bjale, ke selo sa go tlaba kudu gore Modimo o tla romela moprofeta wa Gagwe ntlong ya mohlologadi. A lefelo! Eupša o swanetše go be a bile mosadi wa bokwala ka kgonthé, goba nkabe A se a ke a romela moprofeta wa Gagwe kua. Oo, ge motho a be a ne maswanedi, o be a tla swanelo go ba motho wa maswanedi go thabiša monna boka Eliya.

⁶³ Le a elelwa, e be e le Sakaria, ka ntlong ya gagwe, gore o be a botega le go rereša, a letile Modimo go ba fa ngwana, gomme Morongwa, Gabariele, a tla ntlong. E be e le kgarebe Maria yo a phetšego go hlweka le go seká, le go letela tshepišo ya Modimo, yoo A rometšego Morongwa go yena.

⁶⁴ Boleta ka go kitima go dikologa le lefase le go gerema le lefase, gomme ka gona a letela go bona barongwa le go ba le mehlolo e dirwa, ke go tšwa lenaneong la Modimo. O swanetše go phela gabotse. Hlwekiša ntlo, hlwekiša mekgwa ya gago, hlwekiša dilo tša lefase, go fedisa dikarata tša lena le mokgatlo wa lena wa selefase, go itokiša, gomme morago Morongwa wa Modimo o kgona go bolela le go re, "Se boifeng, ke Nna." Nako yeo dilo di a direga. Eupša o . . .

⁶⁵ Mosadi yo monnyane o be a le tlase a rapela, a sa tsebe gore go sepela go theoga thaba go tla moprofeta. O bile le pono, moo a yago. Modimo ga a etepele batho ba Gagwe ka bofofu, O ba botša mo ba yago. O be a lebeletše ka toropongkgolo. Oo, go be go šiiša. Batho ba be ba ehwa ka tlala, gomme ba goeletše bakeng sa meetse, le batho ba swerwego ke tlala. Ke ponagatšo ya maitshwarohlephi. Ke ponagatšo ya sebe.

⁶⁶ Gomme setšhaba se se go yona. O ka se kgone . . . Meelo, ebile le molao wa tlhago o ka se e dumelele go ba, ge re—ge re be re senya tšhelete ka bophelo bja bohlaswa, gomme seripa sa lefase se ehwa ka tlala (bohole ke batho ba Kriste a ba hwetšego).

⁶⁷ Ke ka lebaka leo mašemo a boromiwa a lego pelong ya ka. Le na le badiredi ba go makatša mo ka Phoenix, le gohle tikologong godimo ga United States le mafelo, dikereke khoneng ye nngwe le ye nngwe, banna ba bagolo ba Modimo, ditirelo tša phodišo, banna ba bagolo boka Oral Roberts le banna ba bangwe ba bagolo, ba rera. Gomme go na le batho godimo mošola, ba ehwa ka dikete letšatši le lengwe le le lengwe, bao ba sa nkago ba kwa ka Leina la Jesu. Ba bannyane ba go šokiša, ba ditšila, manegro a swerwego ke tlala, tlasetlase mošola ka Afrika le godimo ka India, baisa ba bannyane ba robetše mo mokgotheng, ba ehwa, ebile ga ba tsebe se "Modimo" go se rago. Gomme ka gona re phegišana ka diphapano tša rená tše nnyane tša tumelo ya bodumedi. Oo, ga e no ba nnete tlwa (ga ke nagane, bagwera), ge eba go le pelong go gago go bona seo.

⁶⁸ Bjale, hlokomelang mosadi yo monnyane yo wa go šokiša, ka morago ga ge a lebeletše ntle ga lefastere le go bona gore e be e le kgauswi le go hlaba ga letšatši, o be a sa tsebe se se bego se mo letetše. O be a nagana gore e be e le lehu go yena le mošemane wa gagwe yo monnyane. Kafao ke... Ge a sa robetše, a re nong go mo lebelela metsotso e se mekae. O a ya, morago ga ge a rapela, gomme o phaela moriri wa gagwe wo monnyane morago go tšwa mahlong a gagwe, le go re, "Morategi moisa yo monnyane, o lebega kudu bjalo ka wa gago yo bohlokwa, papa yo mokgethwa. O be a tshepile Modimo bjang! O file bjang bophelo bja gagwe bakeng sa morero wa Israele, ntle lebaleng la ntwa! Gomme o lebega kudu bjalo ka yena. Gomme, Hani, ga ke tsebe gobaneng mohlokamolato a tlaišwa le bamolato, eupša ba a dira."

⁶⁹ Setšhaba se, Bakriste, ba tla tlaišega ka baka la go se loke ka dipolitiking, go dira setšhaba sohle go tlaišega.

⁷⁰ Bjale ke kgona go mmona a eya ka gare gomme a re, "Ke tla lokiša khekhe ye nnyane bjale. Ke na le e bja go lekanelia khekhe e tee ye nnyane ya—ya borotho e šetšego, gomme ge re e ejia, morago re tla hwa." Kafao o ya ka kamoreng, gomme a ntšna bupi go tšwa serotwaneng sa bupi. Ke mmone a no bo rothothela ka sela se sennyane, seatla sa lerapo, ge a betha go kgabaganya sego se sennyane bo bego bo le ka go sona; a thinthia, nthatana ye ngwe le ye nngwe ya lerole, gomme mafelelong o nno hwetša go lekanelia kukue e tee; o ya godimo go legapania gomme o le swarela godimo gomme o rothetša nthatana ye nngwe le ye nngwe ya oli go tšwa go lona, e ka ba go tlala lehwana.

⁷¹ Bjale, bupi, dilo tšeо tšohle di na le tlhalošo. Bupi bo be bo emela "Kriste." Kriste o be a le moneelo wa bupi. Ge ba šila bupi bakeng sa moneelo wa go šišinya, bakeng sa Kriste, e bego e le Kriste ka go moneelo wa go šišinya, ka go Testamente ya Kgale, ba bo šitše ka mohuta wo itšego wa tšihilo, gore karowlana ye nngwe le ye nngwe ye nnyane ya bupi e swanetše go segwa go no swana, ka gobane Jesu Kriste o a swana maabane, lehono, le go ya go ile.

⁷² Le elelwa ge tše dingwe tša dikolo godimo fale ga se di tsebe phapano gare ga motangtangwa morakabidi le ditlhodi, gomme ba tšetše wo mongwe wa motangtang wa morakabidi ka setopšeng sa ditlhodi, go apea, gomme ba goeleditše, "Go ne lehu ka pitšeng."

⁷³ Eliya o be a ne bupi bja go tlala seatla, a bo lahlela ka pitšeng, gomme o rile, "Jang!" Bupi bo dirile eng? Bupi, ka pitšeng, bo e fetotše go tloga lehung go ya bophelong; go tšwa go mothopo wa go fa lehu go ya go mothopo wa go fa bophelo.

⁷⁴ Seo ke selo sa go swana se lego bošegong bjo, ge go na le lehu ka sebjaneng sa gago. Kriste, o lahletšwe ka go sebjana sa gago, a go tliša go tloga lehung go ya Bophelong. Kriste o dira phapano. Go tleng ka pelong ya mothopo, oo, O fa khutšo yeo e

fetago kwešišo. Gomme gape Bo fa Bophelo bjo Bosafelego, "Yo a dumelago go Morwa o na le Bophelo bjo Bosafelego, gomme a ka se tsoge a senyega."

⁷⁵ Bjale, o be a na le bupi, bjo bo bego bo emela Kriste. Gomme Kriste ke Lentšu. "Mathomong go be go le Lentšu, Lentšu le be le le go Modimo, gomme Lentšu e be e le Modimo. Gomme Lentšu la dirwa nama gomme la dula magareng ga rena." Kriste, moneelo wa Bupi! Morago o ile le go hwetša oli. Gomme *oli* e emela "Moya." Kafao o beile Lentšu le Moya mmogo, gomme a thoma go Bo hlakanya.

⁷⁶ Oo, se sengwe se swanetše go direga ge seo se direga! A nke go be bošegong bjo gore Lentšu le ke le rerago le wela ka pelong ya gago. Gona a nke Moya wo Mokgethwa o tsene ka fale gomme o ye go hlakanya Woo. Šetšang se se diregago ge le bea Lentšu le Moya mmogo! Jesu o rile go mosadi mo sedibeng, "Mosadi, Ke a go botša, nako e etla, gomme bjale ke yona, ge Modimo a nyaka go rapela ka Moya le ka Therešo." Gomme Yena ke Therešo.

⁷⁷ Bupi, lebelelang se a se dirilego, o hlakantše Lentšu le Moya mmogo. Batho ba bantsi ba na le Moya ntle le Lentšu, bangwe ba na le Lentšu ntle le Moya. Eupša o tšea, bea Tšona bobedi ka tshwanelo lefelong la tšona, go ne khekhe mo tseleng! Go ne se se diregago.

⁷⁸ Mohlologadi yo monnyane wa go šokiša o be a sa tsebe se a bego a se dira, eupša Modimo o rile go Eliya, "Ke mo laetše."

⁷⁹ Gomme Eliya o tseleng ya gagwe godimo ga matlapa a moroki, a etla tlase go bona pono ya gagwe e phethagatšwa felotsoko. Gomme šole yena a eme fale, megokgo a e phumola ka lenkgeretla la gagwe la kgale la seatla, gomme a re, "O Jehofa Modimo, tumelo ya ka ga se nke ya šitwa, gomme e ka se šitwe. Ka mokgwa wo mongwe goba wo mongwe, ga ke tsebe gore sohle se se bjang, eupša re a rutwa gore dilo tšohle di šomela mmogo go iša go tše botse." O be a hlakanya bupi bjo bonnyane bjo godimo, o ile a hwetša khekhe ye nnyane ka moka e beatantswe ntle gomme ya phaphathwa. Orile, "Bjale ke nako go nna go ya ntle le go hwetša dikgong." O ya morago gomme o bula mojako, gomme o rile, "O Morena, mpa yela ye nnyane ya go šokiša e swerwego ke tlala e robetšego fale, gomme ga se ka ja lebaka la dibeke tše pedi goba tše tharo. Ke mo file seripa sa ka sa khuku."

⁸⁰ Yoo ke mme, lerato la mme go lesea la gagwe. Ga se gona boka lona, feelsa lerato la Modimo. "Mme a ka lebala lesea la gagwe le anywago, eupša Nka se tsoge ka le lebala. Maina a lena a tlokilwe ka magoswing a diatleng tša Ka." A ka kgona bjang Yena go le lebala? "Nka se tsoge ka le tlogela, goba go se tsoge ka le šia. Ke tla ba le lena ka mehla, ebile go fihla bofelong bja lefase."

⁸¹ Šole o lebelela lesea la gagwe, mohlomongwe o ngwegetše morago gomme a atla phatla ya gagwe ye nnyane. Ge eba o ile a idibala gomme a hwa ka ntle. O ya ka ntle. E no thoma go ba

mohuta wa . . . letšatši le thoma go hlabo godimo ga dithaba tša Judea. Gomme o lebelela letšatši le thoma go nyarela. Tsela go theoga mokgotha o kwa maroga le go ya pele. Gomme o ya ntle ka serapeng gomme, hlokamelang, o topile diphata tše pedi (e sego morwalo wa letsogo), diphata tše *pedi*. Ke eng? Ke “Sefapano.”

⁸² Bjale, yo mongwe le yo mongwe o a tseba, e ka ba mang wa bagwera ba ka ba Maindia mo o a tseba, goba motsomi e ka ba mang, tsela ya maleba ya go dira mollo go tšeа nako e telele, ke, go fapanya dikota tše pedi, dikota tše pedi, go e gotetša thwi mo bogareng, le go no tšwelapele go kgotletša dintlhana ka gare. Go tla tšeа bošego bjhole. Nako ye ntsi ke robetše ka lešokeng, le diphata tše pedi e sego tše kgolwane go feta *tsela*, gomme ka ruthufala bošego bjhole. Feela go lekanelo go ruthufala, go e boloka e eya thwi ka bogareng bja yona.

⁸³ Bjale o ya go dira eng? Gotetša diphata tše pedi tše. Gomme Lentšu le Moya di tlišitše sehlabelo ka bosona godimo ga sefapano, go lokela mošomo, go lokela bophelo. Go bea Lentšu le Moya, yeo ke tumelo ya gagwe ka go Lentšu la Modimo ka Moya wo Mokgethwa, a ithahlela yenamong go dira e ka ba eng gape Sefapanong. Gomme ge a hweditše phata ka tlase ga letsogo la gagwe, tše pedi tša tšona, gomme a thoma go ya morago, o thomile morago, gomme fao go bile segalontšu se se tšwilego kgorong, “Mohumagadi.”

⁸⁴ Feela pele ga fao, wa kgale, mohlomongwe hlogo ya lefatla, gomme bopududu bo lekeletše godimo ga maledu a gagwe, le moriri wa gagwe o lekeletše fase, lepara le lennyane ka seatleng sa gagwe, letlalo la nku la kgale goba se sengwe se phuthetšwe go mo dikologa, a sepela go theoga mokgotha, a re, “Morena, ke legora le itšego le lennyane le lešweu. Go tla ba mosadi yo moswa wa go lebega go ratega” (o swanetše go be a be a le yo moswa, mošemane o be a le yo moswa) “ntle ka serapeng. O mpoditše gore e be e le mohlologadi yo a bego a swanetše go mphepa. Bjale, o kae? Ke tla tšwelapele ke sepela.” Moya o mo hlahlela tseleng *ye*, morago wa mo phaolla. Oo, go makatša kudu bjalo ka barwa ba Modimo ba hlahlwa ke Moya wa Modimo. Ga go kgathale e kwagala bošilo gakaakang, ba a hlahlwa! O ya . . . O theoga mokgotha o tee le go rotoga wo mongwe, go theoga mokgotha o tee le go rotoga wo mongwe.

Ka morago ga lebakana, Moya o rile, “Lebelela go la gago la go ja.”

⁸⁵ Gomme o e lebelela go dikologa ka mokgwa *woo*, feela boka A dira fa mo sefaleng, bošego morago ga bošego. Oo, Modimo o sa swana! “Lebelela go la gago la go ja, go la nngele la gago, fao go yo mongwe a rapelago yo a e hlokago.”

⁸⁶ Gomme o lebeletše go la gagwe la go ja. “E re, go na le legora le lennyane le lešweu. Leo le no ba gabotse. Ke no se šuthe go tloga mo, gobane go ne mohlare wa kgale o eme kua. Gomme

go na le se sengwe le se sengwe feela ka tsela ye ke bonego ka ponong.” Mojako o a bulega gomme mosadi yo monnyane yo moseso o tšwela ntle.

⁸⁷ Bjale, elelwang, o no ya go topa diphata tše pedi. O be a ka se kgone go topa tše tharo, go tsea tše pedi go dira Sefapano. O ile a topa diphata tše pedi gomme a di bea godimo ga letsogo la gagwe gomme a thoma go ya morago, a nagana, “Ke tla ba le khekhe ye nnyane e dirilwe ge morwa a phafoga. Gomme ka gona ke tla mo leša yona, nka se je le ge e ka ba efe nnamong. Gomme ke tla bea mošemane wa ka yo monnyane ka matsogong a ka, gomme fao re tla dula le go hwa.” Gomme o thomile ka ntlong.

⁸⁸ O kwele segalontšu sa go se tlwaelege go kgabaganya kgoro, se re, “Mosadi, a o ka nkgela meetse a mannyane a go nwewa ka sego?”

⁸⁹ Gomme a retologa, gomme a gopola, “Fale go eme monna wa mokgalabje yo botho seferong.” O mo lebeletše kgauswi ka kgonthe, gomme mohlomongwe a phumola dikeledi go tloga mahlong a gagwe, go be go sa le ka leselaphutiana. Le a tseba, Modimo o dira dilo tša go se tlwaelege kudu. O be a rata go dira sehlabelo. Meetse e be e le selo sa go hlokwa, e be e sa nke ya na lebaka la mengwaga ye meraro le dikgwedi tše tshela.

⁹⁰ “A o ka nkgela . . .” Mohlomongwe Modimo o mmoditše go bolela seo, go bona se a tla se dirago, go leka go arabela ga gagwe. “A o ka nkgela feela seno se sennyane sa meetse ka sego?”

⁹¹ Gomme o mo lebeletše. “O kwagala go fapana. Go na le se sengwe ka mokgalabje seo ke mo kwelago bohloko.”

⁹² Modumedi e ka ba mang ka go Modimo o tla abelana go ona magomo le yo mongwe. Ee. Seo ke selo se tee ka batho ba Pentecostal, ba tla fa hempe go tloga mokokotlong wa bona, bakeng sa Morero. Yeo ke nnete. Ke therešo. Seo ke selo se segolo, se sengwe sa dilo tše kgolo ka bona. Ke bona bafi ba bagologolo mo lefaseng, gobane ba a tseba gore dithoto tše tša lefase ga di re selo. Ba bea mahumo a bona godimo ka Legodimong, gobane ba ya godimo kua a mangwe a matšatši a.

⁹³ Gomme kafao mosadi yo, o rile, “Ke tla no abelana meetse a ka. Re ya go hwa, kafao ke tla neela seno sa ka sa meetse, gomme ka se fa mokgomana yo botho wa go tšofala a emego fale, gobane o bonala a nyorilwe le go lapa.” O rile, “Ke tla a tliša.” Gomme a thoma go sepela go ya pele.

⁹⁴ Gomme gape o kwele segalontšu, se re, “Gomme ka seatleng sa gago se sengwe, a o ka ntšeela lerathana le lennyane la borotho?” Oo, nna! Bjale, bjale eng?

⁹⁵ Kholofelo ya gagwe ya mafelelo ya bophelo bja ngwana wa gagwe. Kholofelo ya mafelelo ye ba bilego le yona, gomme borotho bo tla be bo ile, oli e sepetše, se sengwe le se sengwe se tla be se ile bjale. Eupša o lebeletše morago, gomme a

makala. O rile, “Ke no ba le bupi bjo bonnyane nthatana bo šetšego ka serotwaneng. Ke na le feelsa oli ya go lekanelo ye ke e dubagantšego, gomme ke šetše ke e apešitše, goba, ke e hlakantšhitše. (Ke na le Lentšu le Moya di hlakane mmogo ka kua. Ke na le Sefapano mo go le bea godimo, go le dira khekhe ya go fa Bophelo.)” Gomme ke ge Moya le Lentšu di etla mmogo, mo Sefapanong, go go direla llofo ya Bophelo. Yeo ke nnete. “Gomme ke na le yona mmogo, gomme ke ya ka gare bjale go e paka, gomme ke fe mošemanwa ka yo monnyane a hwago ka kua, yo a llilego bošego bjohle bakeng sa se sengwe go ja, ke—ke swanetše go mo fa yona. Ke ya go dira sehlabelo sa ya ka gomme ke—ke ya go e fa yena. Gomme ka gona ke tla mo tseela godimo ka matsogong a ka, gomme bobedi re tla letela lehu.”

⁹⁶ O rile, “Eupša, o ntirela ye nnyane, pele.” A seo ga se tlabe gore monna o tla kgopela mosadi wa mohlologadi, a ehwa, bakeng sa nthatana ya mafelelo ya sejo a bilego le sona ka ntlong, le ngwana yo a hwago? Modimo o dira dilo go se tlwaelege kudu! O rile, “Ntirele ye nnyane, pele!”

⁹⁷ O lekotše, “Le a tseba, Beibele e bolela gore re thabišitše basetsebje. Re thabišitše basetsebje, ba be ba le barongwa, re sa tsebe se re bego re se dira.” “Gabotse,” o rile, “ke tla e dira.”

⁹⁸ Gomme ge a retologa, o rile, “Ka gore . . .” Oo, nna. Fao go bile, dikhomotšo tše kgolokgolo kudu tše modumedi e ka ba mang a kilego a theetsa go tsona, “Ka gore, O RIALO MORENA!” Leo ke Lentšu le a bego a le letile. “O RIALO MORENA, ‘Seroto se ka se fele, le sedibelo se ka se gope, go fihla letšatši leo Modimo a romelago pula lefaseng.’”

⁹⁹ Re hwetša eng kua? Nyakang pele Mmušo wa Modimo, le toko ya Gagwe, dilo tše dingwe tšohle di tla oketšwa. “Ke tseba bjang, Ngwanešu Branham? Ke tseba bjang?” Selo se nnoši ke se tsebago, bea Modimo pele le go ya pele. Sehlabelo! Hlakanya oli, hlakanya le—le Lentšu le Moya mmogo, ippee wenamong godimo ga Sefapano, gomme o re, “Ke nna yo, Morena.” Bea Modimo pele ka go se sengwe le se sengwe!

¹⁰⁰ “Ka gore, O RILALO MORENA, ‘Sedibelwana se ka se gope, ešita seroto se ka se fele, go fihla letšatši le Morena Modimo a romelago pula godimo ga lefase.’” O tsebile, nako yeo, yola e be e le moprefeta wa Modimo a bolela le yena. Oo, ka fao pelo ya gagwe e swanetšego go be e tabogile! O kitimetše ka gare gomme a dira khekhe ye nnyane yela le go e tliša go yena, ka meetse, diatla tša go roromela godimo ga marama a le a kgale a go nwelela, o tsebile gore Modimo o be a tlide go hlakodiša, godimo ga seripana se sennyane sa borotho.

¹⁰¹ Oo, o no tše tshepišo e tee ye nnyane ya Modimo, gomme wa hwetša se sengwe le se sengwe gabotse, le go tšwa tseleng, šetšang se se diregago! Hwetšang pelo yela . . . gosedumele kgole go tloga go yona. Nno tše tumelo yela ye nnyane yeo o nago le

yona, gomme o e bee godimo ga Sefapano, gomme o re, "Se ke sohle ke nago le sona, Morena. E tšee"; šetšang go retologa, "O RIALO MORENA." Oo, O no swana lehono bjalo ka ge A kile a ba. Seo ke se a bego a se letile.

¹⁰² Mohlomongwe go lebega leswiswi kudu bjale, eupša, le a tseba, dinako tše dingwe re a rutwa (gomme ke rerile ka yona bošego bjo bongwe) ka mehla ke leswiswiswi pele ga letšatši. Ke ka go iri ya leswiswiswi kudu ya bošego ge naledi ya moso e phadima, e bonagatša go tla ga letšatši.

¹⁰³ Ka Jeremané ba na le seswantšho, ba se bitša sa "Leru" seswantšho. Ke—ke phenkgišano go seswantšho se segolo se sa papolo ka...ka Forest Lawn ka Los Angeles (seswantšho se segolo ke bophara bjalo ka ge moago wo o putla, ba ile ba swanelia go aga moago go dikologa seswantšho; bontši bja lena le se bone). Eupša se ka Jeremané se bitšwa, "morongwa..." goba, "Letšatši la Leru," ke a dumela se a bitšwa. Gomme ge o tloga go karolwana go tloga go sona gomme wa se lebelela, oo, se bonala go šišimiša, go lebega o ka re maru a go befelwa a hlakana go dikologa seng sa ona, ka mokgwa woo, ge dietša di bonagala godimo ga sona. Gomme go lebega o ka re maru a a sepela, bjalo ka tsela ye seswantšho se dirilwego go bonagatša dietša, go se dira se bogego boka leru, ledimo la go befelwa le etla go rathaganya se sengwe le se sengwe. Gomme ka gona o botšwa ke mohlahli, "Sepelala kgaušwana, gomme e no tšwela pele o se bogetše." Gomme ge o batamela kgaušwi ka kgonthe go sona, ga se maru, ke diphego tša barongwa di rethetha mmogo, ba hlalala. Ke tšhegofatšo ka go ikgakantšha.

¹⁰⁴ Mohlomongwe bolwetši bja gago bošegong bjo, mohlomongwe sehlabelo sa gago go tla ntle fa, e be e no ba tšhegofatšo ka go ikgakantšha. Barongwa ba Modimo ba mo, ba gona, go kopanya diphego tša bona mmogo le go hlalala, gobane go ngwadilwe ka Lengwalong, gore, "Barongwa ba Legodimo ba hlalala ge modiradibe yo motee a sokologa." Naganang ka seo. Gobane, O RIALO MORENA, Jesu Kriste o a swana maabane, lehono, le go ya go ile. Mogau wa gagwe o ka se kgone go lapišwa. Gomme O rata go le fa e ka ba eng dipelo tša lena di se dumago.

¹⁰⁵ Bjale a re rapeleng nakwana, ge re sa ne dihlogo tša rena di inamišitšwe ka thapeleng. Gomme ke a holofela gore le dula ka go mokgwatebelelo wa thapelo. A go na le yo mongwe mo bjale (ka mahlo a lena a tswaletšwe gomme dihlogo tša lena di inamišitšwe go leba leroleng leo le tšerwego go tšwa go lona; gomme, ge Jesu a diega, o boela morago leroleng) gomme ga se wa phološwa, a o ka no phagamišetša seatla sa gago godimo bontši *bjoo*, le go re, "Ngwanešu Branham, bophelo bja ka e bile manyami, le bjona, gomme ga se ke phološwe. Nkgopole ka dithapeleng tša gago bošegong bjo, Ngwanešu, ke tla phagamišetša seatla sa ka godimo"? A ke motho yola

ka fa, mošemane, mosetsana, monna goba mosadi, yoo a sa phološwago? Nka se le kgopele bokgole bjo bo itšego, feela go emišetša seatla sa gago godimo bjale gore ke kgone go le rapelela.

¹⁰⁶ Go la ka le letona, Modimo a go šegofatše, Modimo a go šegofatše, Modimo a go šegofatše, le wena, le wena. Felotsoko gape, moragorago ka morago, felotsoko fa ka go mokgobawa gare, nno phagamiša seatla sa gago. Ga go yo motee a lebeletšego, e no ntlogela le Moya wo Mokgethwa go dira se o lebeletše. Bjale, Modimo a go šegofatše, Modimo a go šegofatše. Seo se lokile.

¹⁰⁷ Yo mongwe gape ka mekgobeng ya magareng, phagamiša seatla sa gago godimo, o re, “Ngwanešu Branham, ga ke Mokriste. Ke—ke lapišitše Moya wo Mokgethwa bokgole kudu go tloga go nna go fihla ebile A se sa ntshwenya. Eupša, ka kgonthe, ke a tseba gore ke phošo. Ke a tseba ga se nke ka tsoge ka tswalwa gape ka Moya wo Mokgethwa. Ke a tseba gore ga—ga ka swanela. Ga ke ne e ka ba . . . Ga ke ne dilo tšohle tša ka go ipolela. Ga se ka kgotsofatša dinyakwa tša Modimo tšohle.”

¹⁰⁸ Mohlomongwe o a babja. E ka se dire botse go fihla o kgotsofatša dinyakwa tša Modimo. “Ngwanešu Branham, ke ipoletše Bokriste nako ye telele, eupša ka kgonthe ke belaetše phodišo Kgethwa. Ke—ke no ba mohuta wa go makala ge eba Moya wo Mokgethwa o be o nepile.” Oo, kgaetšedi morategi, goba, ngwanešu morategi, o ka se tsoge wa hwetša selo go tšwa go Modimo ka mokgwa woo. Aowa. O swanetše go kgotsofatša senyakwa se sengwe le se sengwe, gomme ka gona e ba le nnete gore o lokile le Modimo. Gona tsea tshepišo ya Gagwe gomme o sware godimo ga yona.

¹⁰⁹ Go la nngele la ka, a fao go tla ba yo itšego godimo kua? Ba bangwe ba lena batho ba baswa morago kua, feela bontši bjalo, ge o se Mokriste, phagamiša seatla sa gago gomme o re, “Nkgopole, Ngwanešu Branham.” Modimo a go šegofatše, ke bona diatla tša lena, moragorago ka gare, morago ka morago, ke a go bona, mohumagadi; morago mo, ya. Godimo, tsela godimo mo, ee, mosetsana yo monnyane. Ya, ya Morena a le šegofatše lena bohole mmogo fao. Seo se lokile.

¹¹⁰ Bjale, ke le tshepišitše ntle mo seo ke sohle ke tla le kgopelago, go no phagamiša diatla tša lena. Bjale re ya go rapela. Gomme pele re dira se bjale (ka morago ga ge re hweditše badiradibe ka diatla tša bona di phagamišitšwe, masomepedi goba masometharo), ke ba bakae ba babjago, o ka emišago seatla sa gago gomme wa re, “Nkgopole, Ngwanešu Branham, ka dithapelang tša gago, gore Modimo o tla ba le kgaogelo go nna le go mphodiša”? Ke a thanka go na le makgolopedi, goba bontši, a bona. Go lokile.

A re rapeleng.

¹¹¹ Tate wa rena wa Legodimong, go mogau kudu go tla go Wena ka dikgopelo tše. [Lefelo la go se be le selo godimo ga theipi—Mor.] “...gomme go Nna, Ke nna Mohlodi wa lena.” Gomme ba beile seatla sa bona godimo, gona seo se bontšha gore Moya ke wo mogolo go feta saense. Tate, O rile, “Ga go motho a ka tlago go Nna, ntle le ge Tate wa Ka a mo goga pele. Gomme bohole ba ba tlago go Nna, Ke tla ba fa Bophelo bjo bosafelego.” Bjale ke ba Gago, Morena. Ba fe Bophelo, gonabjale, moo ba dutšego madulong a bona. A nke ba be le Bophelo bjo Bosafelego. A nke O ba tsoše ka letšatši la mafelelo, ba neela go Tate Modimo wa Legodimo bjalo ka mabje a boholokwa mo koroneng ya Kereke. E fe, Tate.

¹¹² Ke rapelela ba bao ba babjago le go tlaišwa. Bontši bja diatla tša bona bo ile godimo bošegong bjo, ka gobane ba bone gore mosadi yo ka kgontha a hlokilego Modimo; o bone diiri tšela tša tšhoganetšo di etla. Ga go pelaelo go na le ba bantši ba dutše fa ka tsela yeo ya go swana, bao ba swanetšego go hwa, eupša Modimo o šetše a laetše baprofeta ba Gagwe, gomme se sengwe le se sengwe se lokile. E tla šoma feela gabotse. Ge ba ne kgontha gore se sengwe le se sengwe se lokile, gona ba ne kgontha ka Modimo. Ba ne kgontha gore O boloka tshepišo ya Gagwe. Gona, Tate, re rapela gore O tla šogana le bona bošegong bjo, bjalo ka ba go rata ba gago, bana ba go babja; gomme o tla fodiša ditlaišego tša bona, le go ba fa maatla le mogau le tumelo. Dira, Tate.

¹¹³ Šegofatša badiredi bohole bao ba lego fa bošegong bjo, baprofeta ba gago ba boholokwa. Re a rapela gore o tla ba tlotša, Morena, gomme anke ba be bona ba tla šegofatšago magae a batho ba, gore go tla ba le Borotho bja Bophelo ka magaeng a bona ge feela ba phela. A nke sedibelwana sa bona se se tsoge sa oma, goba diroto di se be le selo. A nke go be le borotho bja semoya ka kerekeng ye nngwe le ye nngwe go kgabola naga ye, Morena, bjoo bo tla fepago ba swerwego ke tlala bao ba hlokago. E fe, Morena.

¹¹⁴ Re a Go rata. Gomme re a tseba gore O re ratile pele, ka gore ge re be re sa le badiradibe, Kriste o re hwetše, Tlhokamolato bakeng sa ba molato, go ba seloba sa dibe tša rena, go re boelanya morago go Modimo; ge re be re lahlegile le go se butšwe, ntle le Modimo goba Morwa wa Gagwe, go tloga serapeng sa Edene, go tšwa go dikarogo tša botatawešo ba re tlisitšego ka go tlhakahlakano ya sebe. Gomme Jesu o re ratile bjalo gore A tle ka thato ya Modimo le go re lopollela morago go Modimo, ka moneelo wa bophelo bja Gagwe mong kua Khalibari. Ke a Go leboga, Tate, bakeng sa botho bjohle bja Gago.

¹¹⁵ Re phela ka merithing ya nako ya bofelo. Go ka no se be le gosasa bošego. Ga ke tsebe, Morena, seo ke go Wena. Eupša ge go sa kgonega gore ba bangwe ba ka kgona go tsena bošegong bjo, Tate, ke a rapela gore O tla romela Moya wo Mokgethwa.

¹¹⁶ O rile, “Bjalo ka ge go bile matšatšing a Sodoma, go tla ba bjalo mo go tleng ga Morwa wa motho.” Ka matšatšing a Sodoma, ba bile le magoro a mararo a batho: modiradibe, moleloko yo bolelo wa kereke, le Mokgethiwa (babiletšwantle); Basodoma, le Baloto, le ba Abraham (ba biditšwego go tšwa lefaseng). Basodoma ba amogetše badiredi ba babedi ka molaetša wo mogolo. Gomme sehlopha sa Abraham se amogetše leswao, gomme leswao e be e le Monna wa lerole godimo ga diaparo tša Gagwe, yo a tsebilego Abraham, go beng mosetsebję; o tsebile mosadimogatša wa gagwe, Sarah, se leina la gagwe le bilego; gomme, a botša Abraham, ka mokokotlo wa Gagwe o šotologetše tente moo Sarah a bego a le gona, “Gobaneng a segile?” O Modimo, a nke kereke e phafoge gomme e bone! Bjalo ka ge Jesu a rile, “Bjalo ka ge go bile matšatšing a Sodoma, go tla ba bjalo mo go tleng ga Morwa wa motho.” Modimo yola wa go swana o tla bonagala ka nameng ya Kereke ya Gagwe, gomme o tla bontšha leswao la go swana. E fe, Morena, gape bošegong bjo. Re kgopela ka go la Jesu Leina. Amene.

Ke a Mo rata, ke a Mo rata

Bjale e nong go Mo rapela ka bose ka Moyeng.

Gobane O nthatile pele
Gomme a lefela phološo ya ka
Godimo ga mohlare wa Khalibari.

¹¹⁷ Oo, ka morago ga molaetša, feela a ga le ikwele lohle le pitletšwe ntle? Feel Moya wo Mokgethwa o no hlwekiša pelo ya gago go tloga go gosedumele gohle, go go bea thwi morago ka seporong le Modimo gape. Oo, bjale ke nako ya go Mo rapela. Molaetša o fedile, kafao a re nong go Mo rapela gatee gape ka go pina ye, ge re opela *Ke A Mo Rata*. Yo mongwe le yo mongwe, feela ka setu le bose bjale. Tswalela mahlo a gago gomme o no lebelela ka mahlo a gago a semoya go Yena, bona se A se diretšego mohlologadi yola. O a ratega go Yena bjalo ka mohlologadi yola, O bolokile bophelo bja gago, le wena. A ga o Mo rate?

Ke a Mo rata, ke a Mo rata
Gobane O nthatile pele
Gomme a lefela phološo ya ka
Godimo ga mohlare wa Khalibari.

Matwetwe yo Mogolo bjale o kgauswi,
Jesu wa go kwelabohloko;
O bolela go hlaletša pelo ye e sekamilego,
Ga go leina le lengwe eupša Jesu.

Noute bosebose ka go pina ya baserafe,
Leina le le bosebose lelemeng la go hwa,
Kherole ye bosebose e kilego ya opelwa,
Oo, Jesu, Jesu yo bohlokwa.

¹¹⁸ Ge a e fa khote go okene, ka boleta. [Ngwanešu Branham o hama *Matwetwe Yo Mogolo*—Mor.] Ge ke ekwa pina yela, e tliša selo se tee go nna. Nako ye nngwe ya go feta ka Ft. Wayne, Indiana, fao go be go le mosetsana yo monnyane wa Dunkard a dutše, a bapala piano. O be a se Mopentecostal, eupša o bile le moriri wo motelele wo mobotse o dirilwe ka morago. Gomme ke be ke eya go rapelela balwetši, gomme wa mathomo mo mothalong o be a le mošemane yo monnyane, o be a golofetše, taba ya pholio. Gomme ke ile ka kuka mošemane yo monnyane go tšwa matsogong a kgaetšedi, gomme ka swara mošemane yo monnyane, gomme ka re, “Ka therešo, Matwetwe yo mogolo o fa, o tseba diphiri tša dipelo tšohle.”

Gomme ke rile, “Le dumela seo?” go batheeletši ba dikete tše mmalwa tša batho.

¹¹⁹ “Ee,” bohole ba e dumetše. Eupša ba be ba le mohuta wa go swara morago, e bile bošego bja mathomo bja kopano, gomme ba be . . . Molaetša o be o le thata go bona go kwešiša.

¹²⁰ Gomme ke rile, “A le dumela gore Morena Jesu a ka mpotša mošemane yo monnyane yo ke mang, le se leina la gagwe e lego? A le tla dumela? A yoo e tla ba Morongwa wa go swana yo a kopanego le Abraham, yo a tsebilego se Sarah. . . A e tla ba Jesu wa go swana yo a tsebilego Nathaniele ge a tlide, yo a tsebilego Petro gomme o mmiditše ka leina, o boditše mosadi mo sedibeng, le dilo tše tšohle? A yoo e tla ba Jesu wa go swana?” Bohle ba phagamišitše diatla tša bona, ba naganne e tla ba.

¹²¹ Gomme Moya wo Mokgethwa o thoma go utolla se. Gomme, ge A dirile, mošemane yo monnyane o tabogetše ka ntle ga matsogo a ka, a kitimela tlase le go taboga go tloga sefaleng. Mme o ile a idibalaka setulong a dutše thwi pele ga mošemane yo monnyane. Gomme mošemane yo monnyane a kitimela godimo le fase. Mosetsana wa Moamish, goba Dunkard e be e le, a raloka piano, o ile a fetoga bošweu ka nnete, a tabogela godimo ka gare—ka gare ga kopano, gomme moriri wa gagwe wa wela godimo ga mokokotlo wa gagwe. O be a apere roko ye tšhweu. O bonagetše boka morongwa. Gomme a thoma go opela yela ka maleme a šgo se tsebje. Gomme, ge a dirile, piano ga se nke ya foša noute, e bapala:

Matwetwe yo Mogolo bjale o kgauswi,
Jesu wa go kwelabohloko;
O bolela go hlaletša dipelo tše di sekamilego,
Ga go leina le lengwe eupša Jesu.

¹²² Batho ba be ba rakeletše go dikologa aletara, le go lla le go wela ka mekgobeng, gomme ba goeletša “Modimo nkgaogelete!” Oo, a kopano e bilego gona!

¹²³ Matwetwe yola yo mogolo o sa le mo. Ga se A ke a šitwa. A ka se tsoge a palelwa. Bjale, ke ba bakae ka fa ba dumelago seo,

ka potego, ka pelo ya lena yohle, gomme o mo bošegong bjo ka ditetelo tša go fodišwa ke maatla a Modimo?

¹²⁴ Ge go na le yo mongwe ka moagong ke mo tsebago, ka ntle ga ba thwi mo, bašemane ba ba dutšego mo, ba bararo ba bona bao ke boletšego le bona letšatši le lengwe ka ga poledišanonyakišo, go tšwa Arkansas; Ngwanešu Pat Tyler, e lego morukhuhli yo a sokologilego; Ngwanešu Williams a dutšego thwi fale; gomme bokgole bjo nka kgonago . . . le Ngwanešu Gene Goad, mokgotsi wa ka, o dutše thwi fa. Gomme ke a thanka seo ke sohle ke se bonago ka moagong bao ke ba tsebago mo nakong ye, eupša ka tsela ye ke tseba batho ba ba dutšego fa.

¹²⁵ Bjale, ke eme le Korana ka seatleng se tee, gomme Beibele ka go se sengwe, pele ga dikete tše lekgolo, gomme ka re “e tee e swanetše go nepagala, gomme ye nngwe e phošo.” Gomme bodumedi bja Bokriste ke bjo botee feela magareng ga mabodumedi ohle; gomme Full Gospеле ke sehlopha se nnoši magareng ga bona seo se ka netefatšago gore Jesu Kriste o sa phela. Ka moka ga bona ba na le thutamodimo, gomme ba tla go botša ka yona, “Re no ba le saekolotši ye ntši.” Bomohammedan ba re, “Re no ba le saekolotši ye ntši. Re ka goelela feela kudu godimo ga moprofeta wa rena bjalo ka ge o ka kgona godimo ga Jesu wa gago. Eupša moprofeta wa rena ga se a ke a re tshepiša selo. Jesu wa gago o go tshepišitše gore O tla tsoga go tšwa bahung, le dilo tše A di dirilego o tla di dira le wena gobane O tla phela ka go wena. Bjale o re moprofeta wa rena o hwile, ntle kua ka lebitleng, gomme le na le Jesu yo a tsogilego. A re Mmoneng a dira.” Ba tla bea . . . o se ke . . .

¹²⁶ O ka kgona go bapala tikologong mo le ba bangwe ba baithutamodimo ba, ka mantšu a mangwe a Segerike goba se sengwe seo o gakantšhwago gohle ka sonamong, eupša o se tsoge wa leka go e tliša go makgaolakgang le ba bangwe ba bona batho. Bokaone o be le se o bolelago ka sona. Gomme bokaone o tsebe. Ke ka lebaka leo go lego bothata go hwetša baromiwa godimo fale. Ba tseba se ba bolelago ka sona. Gomme bokaone o tsebe, gobane ba ya go bitša seatla sa gago godimo ga yona.

¹²⁷ Eupša ke leboga kudu bošegong bjo, go tseba, bagwera, gore Jesu wa rena (le tshepišo ye nngwe le ye nngwe yeo A e dirilego) ke Therešo. Ge nka kgona go fodiša yo mongwe mo, ke tla e dira; ge nka se e dire, ke tla ba moikaketši. Eupša nka se kgone. Eupša Modimo o file mpho go kereke, yeo A e tshepišitšego.

¹²⁸ Gore lebakeng la matšatši a Luther, re phetše ka tokafatšo. Lebakeng la matšatši a Wesley, re phetše ka tlhwekišo, kereke e bile bonnyane. Ka matšatšing a Pentecost, re phetše tlase go kgabola Kolobetšo ya Moya wo Mokgethwa le pušetšo ya dimpho. Bjale ka kgonthe re ka bonnyaneng, go tla ga Morwa wa Modimo. *Mo* ba dumetše ka tumelo; *mo* ba gooleditše ka tlase ga tlhwekišo; *mo* ba boletše ka maleme bjalo ka mpho; eupša

bjale nekethifi le phosithifi, gomme se—se seapešo se tla godimo ga phiramiti, gomme ke nako ya bofelo, ge Kriste le kereke ya Gagwe ba swana kudu go fihla e eya go bitsa bahu go tšwa go Methodist, Lutheran, le bohle bale morago fale, gomme go tla ba le tsogo. Bona ba ba robetšego ka go ya pele, ya bobedi, ya boraro, ya bone, ya bohlano, ya boselela, le tiišo ya bošupa, o tla tsoga le lengwe la matšatši a, go kopana le Jesu lefaufaung. Iri e fihlile, bagwera, go Tla ga Morena go batametše.

¹²⁹ Re lebelela Jerusalema gomme ra bona gore Bajuda ba foufaditšwe ka lebaka la rena. Mohlare wa mogo o a khukhuša. O rile, “Gomme mehlare ye mengwe.” Billy Graham o hlotše tso-tso tsošeletšo magareng ga batho ba mehleng. Oral Roberts o hlotše tsošeletšo magareng ga Mapentecostal. Gomme bjale Jesu, Morwa wa Modimo, o tlile ka gare go mašalela a, go goga batho bakeng sa Leswikhahlogo, go tliša morago Morwa wa Modimo, go feleletša selo bakeng sa go Tla ga Morena Jesu. O rile, “Bjalo ka ge go bile matšatšing a Sodoma, kafao go tla ba bjalo ka go Tleng ga Morwa wa motho.”

¹³⁰ Ke tla retollela magetla a ka go lena, e sego feelsa gore le tle le bone. Bjale, elelwang, e be e se motho. Monna yo a dutšego fao o be a no ba khalesiamo, photše, le petroleamo, dielemente tše lesometshela tša lefase tše Modimo a ilego go tšona, “Fše!” o thuthupišitšwe mmogo gomme a tepogela ka go yona gomme o be a phela.

¹³¹ Jesu Kriste o be a le selo sa go swana. O be a le Morwa wa Modimo. O be a le Modimo a bonagala nameng, eupša nama ya gagwe e be e le motho, Moya wa Gagwe e be e le Modimo. Ka gona O tshepišitše ka matšatšing a mafelelo gore O tla tla ka Kerekeng ya Gagwe. “Lebakana le lennyane gomme lefase ga le sa Mpona gape; efela lena le tla Mpona, gobane Ke tla ba le lena, ebile ka go lena. Mediro ye Ke e dirago le tla e dira le lena.” Le a bona? Bjale Matwetwe yola yo mogolo o fa.

¹³² O rile, bjale, “Leswao la Sodoma le Gomora.” Bjale, ke eng? Lebelelang maphephe a rena, “Bongboswana, phapogo, e oketšega ka masomenne a phesente godimo ga mengwaga ye lesome ya go feta.” Ditšhišinyego tša lefase mafelong a go fapani, mehuta yohle ya maswao a go Tla. Kereke e wele, nako ya bofelo fa.

¹³³ Bjale Modimo o bontšha maswao a Gagwe, le yena, bjalo ka ge re be re rera ka yona. Bjale, ge Beibele ye e le thereša, yeo E lego, ke komana go hwela morero woo. Beibele ke therešo. Jesu Kriste o a phela. Re Kereke ya Gagwe, re tladišwego ka Moya wa Gagwe, gona Bophelo bja Gagwe ka go rena bo tla tšweletša Bophelo bja go swana bjoo A phetšego ka go Morwa wa Modimo, ge Moya wo Mokgethwa—Moya wo Mokgethwa wa Modimo o phela ka go rena.

¹³⁴ Bakeng sa letago la Modimo le bakeng sa kereke, le bakeng sa bolwetši bja lena, lena bao le babjago le go tlaišwa, kgwathang morumo wa kobo ya Gagwe le go bona ge eba o ka kgona go Mo dira a bolele ka nna, bjalo ka mohlanka wa Gagwe, a go bitša boka A dirile mosadi yo a kgwathilego kobo ya Gagwe. A nke Morena a e fe. A se tla go dira o dumele bogolo, le go amogela phodišo ya gago? Ke ba bakae ba dumelago ba ka kgona go amogela phodišo ya bona ge Modimo a ka go bitša ka mokgwa woo, goba go Mmona a bitša? Phagamiša seatla sa gago. Morena e fe.

Tšwetšangpele *Matwetwe* yo Mogolo yela e bapala, a le tla? Ke ikwela ke hlahlwa go dira seo.

¹³⁵ Ke ya go retologela go bagwera ba ka fa bošegong bjo gape, feela go le lebelela. Baena, ga ke leke . . . go lena . . . Modimo ke hlatse ya ka, Ngwanešu David. Feel a bjalo ka ge ka kgonthe ke e dirile go ba pepeneneng go lekanelo go batho, gore, ga se nna. Ga ke na le selo go dira le yona. Ke no ba . . . Modimo o ile a swanela go šomiša yo mongwe. O . . . Gomme ga go diatla tše di swanelago, eupša Modimo o di dira gore di be le maswanedi. Le a bona, O—O—O kgetha pele ga motheo wa lefase, Morero wa Gagwe go ka dirwa, gomme o swanetše go dirwa, o swanetše go phethwa.

¹³⁶ Kereke e ya go ba gona, ntle le sepatsa goba lengalatsepa. Mogau wa Modimo o tla dira seo. E tla swanela go, go tla tsea mogau. Boka A boletsé le Abraham, ge Sarah a Mmelaela. Gabotse, thwi nako yeo A ka be a bolaile; A ka be a bolaile Sarah thwi nako yeo bakeng sa go kamaka, ka gore seo ke sebe se se mpe kudu se lego gona, ke gosedumele, gomme sebe se nnoši. Gomme o belaetsé le go sega ka gare ga gagwemong ge Morongwa a mo hlathile go kgabola tente. A yeo ke nnete? Eupša gobaneng A se a kgona go tsea Sarah? Gobane o be a le karolo ya Abraham, O be a tla swanela go tsea Abraham, le yena. Gomme re karolo ya Jesu ge re le ka go Mmele wa Kriste. Go se dumele ga rena go a hlokomologwa ge re e dira ka go hloka tsebo boka a dirile, gobane o be a tšhogile.

¹³⁷ A le dumela gore se sengwe se a tšwelela mo sefaleng? Oo, ke duma nka hlaloša se. Ke swanetše go retologa. Ke bona mosadi yo a nago le go hlohlona ga letlalo, o Mo kgwathile. Go tla go tlogela, ka gore gohle ke Seetša go go dikologa. “Ge o ka kgona go dumela, dilo tšohle di a kgonega.” Bjale dumela.

¹³⁸ Gore le tle le bone ga se saekolotši, go bala monagano wa lena, ke tla retollela mokokotlo wa ka morago go lena. Go reng ka godimo ka go karolo *ye?* Se se dirilwe gatee ka Angeles Temple, kgaetšedi. Ngwanešu David, o a elelwa. Bjale ke no . . . gore le tle le bone, ke bolela le lena, seo se laetša gore ga ke na le kgomano le batho fao. Ka nnete le—le kweš— . . . ke a tseba le a kwešiša. Le a bona? Eupša ke kgopela mogau wa Modimo go dira se sengwe seo batho ba ka go se tseba.

¹³⁹ Ee, ke bona motho yo moswa, mosetsana yo moswa. O tšwa kgole go tloga mo, ga a tšwe nageng ye. O tšwa nageng ye e nago le pula gomme e na le mehlare ye mentši le mmalewaneng, o tšwa Oregon. O na le bolwetši bja go wa dihwahwa. O dula ntłe kua. A o a dumela gore Jesu Kriste o tla go dira o loke? A o e amogela bakeng sa gagwe? Emelela, kgaetšedi. Eya gae, gomme ke kgalema diabolo. A o dumela ka pelo ya gago yohle? Go lokile.

¹⁴⁰ Ka go mokgoba wa gare fa, yo mongwe o ne tumelo. Se belaele. Ke tla bolela le wena, Ngwanešu Schultz, gore o kgone go bona gore ke bolela le wena. Ke dumelela yo mongwe fale... Ga go na dikarata tša thapelo kafao e no ba—e no ba gabonolo gona, go se tliše le ge e ka ba mang godimo, eupša gore ba ke ba bone.

¹⁴¹ Ee, go na le mosadi wa go lebega bosese, o na le kankere. O be a swanela go ba sepetlele lehono. O dutše ka pele mo, mohuta wa mosadi yo mosese. Leina la gagwe ke Mohumagatšana Peterson. O a bona? Go lokile, mohumagadi, eba le tumelo ka go Modimo. A nke Modimo wa Legodimo a bolaye diabolo yola go fihla le bile a ka se bonwe ke yo motee gape. A o dumela go Morwa wa Modimo? A o Mo dumela ka pelo ya gago yohle? Go no ba le tumelo ka go Yena, seo ke sohle o swanetšego go se dira. Go lokile.

¹⁴² Lena bohole le komana go dumela godimo ka tsela *ye?* A nke ke bolele le modiredi yo fa. A o dumela ka pelo ya gago yohle? Ke a holofela yo mongwe godimo kua o a dira, le yena. Uh-hum. Gore o ke o no tseba gore ke bolela le wena. Eupša go bona maatla a Modimo a apeša dilo tšohle tša monagano, a ya ka go moyo wa sekgao... sekgao sa moyo.

¹⁴³ Ee, ka morago ga ka go mo—mo mosadi, gomme ga a tsebe se e lego bothata ka yena. Yena o... Oo, mosadi yola wa go šokiša! O bile le e tee, tše pedi, tše tharo, tše nne, dikaro tše tlhano. Ga ba tsebe se e lego. Dingaka ga di tsebe ke eng. O rometšwe fa go ya Arizona bakeng sa go khutša. O tšwa Louisiana, leina la gagwe ke Mdi. Pearson. Go lokile, Mdi. Pearson, felotsoko ka morago ga ka, phagama, ntebelele. A o ntumela go ba moperfeta wa Modimo? Ga ke go tsebe. Ge seo e le nnete, šišinya seatla sa gago. Re—re basetsebane seng sa rena. Se se boletšwego ke therešo. A yeo ke nnete? Dingaka ga di tsebe se e lego bothata ka wena. Ke megalatšika ya gago. Eba go homola ka kgonthe, eba le tumelo, gomme o tla ya gae o fodile. Eba le tumelo go Modimo! A o dumela gore Morwa wa Modimo o tsogile gape?

¹⁴⁴ Bjale, go reng ka yo mongwe ka lehlakoreng *le?* Lena bohole le komana go dumela morago mo? Pat, a o thabile gore o Mokriste? A ga go makatše go tšwa ka ntłe ga bophelo bjo o bego o bo phela, gomme wa ba Mokriste?

¹⁴⁵ Mohumagadi šo. Ke mosadi, monna, le ngwana. Mohumagadi o kgokagana le Modimo. O ka morago ga ka. Gomme o na le mohuta tsoko wa bothata bja mogodu, gomme

o—o na le bofokodi morago ga fao. Ga a tšwe mo, le yena, o tšwa nageng ye e swanago le ya leganata, eupša o tšwa Kansas. Monna wa gagwe ke modiredi. Yoo ke yena a dutšego thwi fale. Ga ke go tsebe. Ge seo e le nnete, mohumagadi, šišinya diatla tša gago ka mokgwa *wo*. Go lokile, mohlomphegi. Go lokile, eya gae, dumela go Morena Jesu Kriste gomme o fole. A o dumela go Morena?

¹⁴⁶ Gohle go dikologa moago bjale, a le dumela go Morena? Nnete, O mo! Jesu Kriste, wa go swana maabane, lehono, le go ya go ile. Modimo wa go swana yo a kgonnego go bontšha Eliya moo mosadi yola wa mohlollogadi a bego a le gona. Modimo wa go swana a ka mpontšha moo o lego, o dutšego, o rapela, gobane ke Moya wa Jesu Kriste, wa go swana maabane, lehono, le go ya go ile. A o a e dumela? A nke motho yo mongwe le yo mongwe ka fa a bee diatla tša lena godimo ga seng sa lena ge ke le rapelela ka kakaretšo, thwi fa, le go dumela, gore o tsebe gore o na le se sengwe ka go yona, yo mongwe le yo mongwe wa lena. Le badumedi, a ga le? Ge le le, e reng “Amene.” [Phuthego e re, “Amene.”—Mor.] Ka Bogoneng bja Modimo, ka go netefatšo ya go se palelwe ya tsogo ya Jesu Kriste, beang diatla tša lena go lena seng gomme le rapelelane.

¹⁴⁷ Tate wa rena wa Legodimong, ke fa go Wena batheeletši ba ba letilego. A nke batho ba bohole bao ba sokologilego dibeng tša bona ba hwetše legae le lebotse la kereke. A nke bao, Morena, ba babjago ba fodišwe. A nke maatla a Sathane a robje, godimo ga mapheolo a bona gonabjale, bjalo ka ge ke kgalemela diabolole go kgopela gore Maatla a Jesu Kriste a tla tla godimo ga batheeletši ba gomme a tšea bolwetši bjo bongwe le bjo bongwe, bolwetši bjo bongwe le bjo bongwe, tlaišo ye nngwe le ye nngwe, pelaelo ye nngwe le ye nngwe. E tloše go bona, Morena, gomme o ba fodiše. Leineng la Jesu Kriste, Morwa wa Modimo, ke a e kgopela. 

ELIYA LE MONEELO WA BUPI NST60-0310
(Elijah And The Meal-Offering)

Molaetša wo ka Ngwanešu William Marrion Branham, setlogong o abilwe ka Seisimane ka Labone Mantšiboa, Matšhe 10, 1960, ka Madison Square Garden ka Phoenix, Arizona, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2022 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org